

En regurdanza da Flurin Spescha

Ina gronda baselgiada ha prendì cumià dal renconuschì scriptur e bun ami e collega

■ (mc) En in act da regurdientscha ha ina gronda baselgiada da parents, amis e collegas prendì cumià mardi passà dal scribent Flurin Spescha en la baselgia da s. Giusep a Turitg. L'ovra litterara dal scribent trapassà che ha stuì concluder sia cursa terrestre al zenit da la vita ha irradià lunsch sur ils cunfins rumantschs e grischuns ora. En omagis persunals han il plevon sur *Giovanni Bargetzi*, il frar *Marc Spescha*, ils scripturs *Beni Vigne* e *Mevina Puorger*, il directur da la Pro Helvetia *Bernard Cathomas* ed il president da la citad da Turitg *Josef Estermann* pennelà differentas fassetas da la personalitad interessanta e fatg ressortir sia prestaziun litterara. *Ricarda Jörg* e la gruppa Akapickels han embellì l'act da regurdientscha cun insaquantas chanzuns che cuntegnevan messadis commovents.

«Sa lamentar ston ils vivs, ils morts han il parvis»

Cun insaquantas sentenzias creadas dal defunct Flurin Spescha e da ses bab Hendri ha sur Giovanni Bargetzi tshertgà da levgiar il cordoli da *Regula Esposito*, maridada pir dapi in mais cun Flurin, dals parents, dals amis e collegas radunads en grond dumber mardi passà a Turitg. Sco convischin da Domat sa Giovanni Bargetzi raquintar da las santupadas cun discussiuns animadas davart Dieu ed il mund sin ils culms da Domat, attestond al trapassà «duns profetics». Flurin haja scrit poesias che sajan daventadas oraziuns en vista a sia mort andetga.

La preschientscha inspiranta

Marc Spescha, il frar dal defunct, lascha reviver regurdientschas d'uffanza. Suenter trais mats spetgava la famiglia ina Flurina, arrivà saja dentant in Flu-



Flurin Spescha, ina personalitad pregnanta, n'è betg pli.

LQ

rin. El era in pop talmain prus e da pauca tschantscha ch'ins haja schizunt ditg temì ch'el saja mit. Promovì da ses dus frars pli vegls e sustegnì da ses bab Hendri saja Flurin sa deditgà en ils giuvens onns cun success al sport da passlung, nua ch'el aveva sviluppà «in segund flad» ed acquistà prestaziuns remartgablas. La vita da Flurin saja dentant era stada umbrivada baud da las fridas dal destin. Sin in viadi cun il tren en Spagna sa disgrazia ses meglier ami mortalmein e Flurin vegn transportà cun grevas blessuras en il spital. Anc en giuvens onns perda el ses bab e mentor patern Hendri. Suandada saja ina perioda da depressiun che saja legraiplamain puspè sa barattada cun muments d'allegria, ils quals Flurin haja giudì intensivamain e cun brama. Ina insuffizienz dal cor haja interrut nunspegtadamain il fil da la vita en ina fasa activa e ventiravla al zenit da la

vita. E Marc Spescha ha concludì «Tia amicezia e Tia preschientscha inspironta, Tia moda da dispitar e d'amar, Tia poesia e Tia ironia vegnan a muncar a nus infinitamein.»

«Chalar da vulair spendrar il rumantsch, anzi viver el»

Beni Vigne portretescha Flurin Spescha sco ami, scriptur, president da l'Uniun da scripturas e scripturs rumantschs, redactor da las Novas litteraras ed iniziand dals Dis da litteratura a Domat. Mevina Puorger, la nova presidenta da la USSR ha illustrà la filosofia dal trapassà cun intgens da ses texts. Flurin haja gì ideas visiunaras e saja sedistinguì cun in spèrt cumbativ. Tranter auter haja el gì ditg: «Chalai da vulair spendrar il rumantsch, nus stua in viver el!» Flurin saja s'angaschà cun anim e vigur, cun fiue e flomma ed en la posa dal grond um en

favur dal rumantsch e da sia litteratura. Il roman «Das Gewicht der Hügel» e l'emprim roman en rumantsch grischun «Fieu e flomma» cuntagnian ses testament litterar. Savens sajan ses messadis dentant betg vegnids chapids. Na senza consternaziun haja Flurin constatà dacurt: «La Rumantschia ei morta per mei.» Flurin Spescha haja dà bler a la Rumantschia, nossa nobla e pretensiusa incumbensa saja ussa da realisar sias visiuns, concluda Beni Vigne.

Persunalitad da variantas fassetas

Il directur da la Pro Helvetia, Bernard Cathomas, caracterisescha Flurin Spescha sco personalitad da variantas fassetas. El aveva ina gronda affinitad per la litteratura, per la grafica, per il film, el saja dentant restà scriptur. Sia forza saja stada quella da dar impuls

innovativs, instradar projects, persvader ed entusiasmar ses conturn. Na tut quai che Flurin haja prendì per mauns saja grategià. El saja era fruntà sin cunfins, magari i sur quels ora, haja provocà ed irrità, di Bernard Cathomas. Flurin haja dentant era apprezzià la cumpagnia, haja fatg sgnoccas e raquintà istorgias, haja inscenà bain e gugent sia litteratura e sasez. Ses character reflectava gronda creativitat, sensibilitad ed originalitad ed adina puspè reussiva ad el da far surstar ses auditori. El eria dentant era in estet che pretendeva bler da sasez e dals auters e che fascheva stim era dals pli pitschens detagls. Flurin haja gì il destin dal salep en la renumada chanzun dal salep e la furmicla: al zenit da sia ventira ha el stuì murir. E Bernard Cathomas concluda cun ils plets da Flurin: «Oz cu jeu hai tertgau ch'ei seigi miu di. Oz cu jeu hai viviu sco aunc mai. Oz sun jeu morts.»

«Nus vein giu bugen Tei»

Sco collavuratur en il departament presidial da la citad da Turitg aveva Flurin Spescha puspè reprimì da curt sia lavur suenter in congedi ed ina dimora da plirs mais en ils Stadis Unids. Il president da citad Joseph Estermann ha caracterisà ses collavuratur, cussegliader ed ami Flurin cun ils predicats «avert, amicabel, sensibel e da vast orizont». Las discussiuns cun Flurin aravan profund ed eran enritgintas. Per la citad da Turitg haja Flurin preparà durant in lung temp da radund 10 onns in entruidament per tals che prendan domicil en la citad da la Limmat. L'ovra interessanta e varianta portia il bul personal dal scribent Flurin e fatschia buns servetschs a la publicitad. Per il mument na possia el betg s'imaginar co che la vita giaja vinavant senza Flurin, ha ditg il president da citad Josef Estermann da Turitg en ses pled.